

### CARMEN VIII

nec quae fugit sectare, nec miser uiue, 10  
sed obstinata mente perfer, obdura.  
uale, puella. iam Catullus obdurat,  
nec te requiret nec rogabit inuitam.  
at tu dolebis, cum rogaberis nulla.  
scelesta, uae te, quae tibi manet uita? 15  
quis nunc te adibit? cui uideberis bella?  
quem nunc amabis? cuius esse diceris?  
quem basiabis? cui labella mordebis?  
at tu, Catulle, destinatus obdura.

### IX

VERANI, omnibus e meis amicis  
antistans mihi milibus trecentis,  
uenistine domum ad tuos penates  
fratresque unanimos anumque matrem?  
uenisti. o mihi nuntii beati! 5  
uisam te incolumem audiamque Hiberum  
narrantem loca, facta, nationes,  
ut mos est tuus, applicansque collum  
iucundum os oculosque suauabor.  
o quantum est hominum beatiorum, 10  
quid me laetius est beatiusue?

### X

VARVS me meus ad suos amores  
uisum duxerat e foro otiosum,  
scortillum, ut mihi tum repente uisum est,